



WIZARA YA AFYA, MAENDELEO YA JAMII, JINSIA, WAZEE NA WATOTO

MWONGOZO WA UPIMAJI WA COVID-19 KWA WATU WANAOSAFIRI NJE YA NCHI.

TOLEO LA PILI, 04 JANUARI 2021

1.0 Utangulizi:

Mlipuko wa ugonjwa wa COVID-19 umeendelea kuziathiri nchi mbalimbali toka ulipothibitika mwezi Disemba, 2019. Hadi kufikia tarehe 03 Januari 2021 jumla ya Wagonjwa **83,322,449** na Vifo **1,831,412** vimeripotiwa Duniani kote. Nchi mbalimbali zimeendelea kuchukua hatua mbalimbali ikiwemo sharti la upimaji wa Maambukizi ya COVID-19 kwa wasafiri wote, kuzuia safari za Kimataifa na katazo la kutoka nje (Lock down). Tanzania ni miongoni mwa nchi ambazo zimechukua hatua madhubuti na kudhibiti maambukizi ya COVID-19.

Mwongozo huu unatokana na kuongezeka wagonjwa wapya wanaoripotiwa kila siku duniani na kuibuka kwa aina mpya ya vimelea vya Ugonjwa wa COVID-19 (New Variant Strains) katika baadhi ya nchi. Sambamba na hilo, kupanda kwa gharama za upimaji wa COVID-19 kunakochangiwa na ongezeko la wasafiri wanaokwenda nje ya nchi na Watalii wanaoingia nchini, mabadiliko ya teknolojia katika upimaji ambapo baadhi ya nchi wameomba kuongezeka kipimo cha **IgM** Antibody sanjari na **PCR** na kuongezeka kwa mahitaji ya vituo vya kuchukulia Sampuli imepelekea maboresho ya Mwongozo toleo la kwanza la tarehe 20 Julai, 2020. Kutokana na hali hiyo, Wizara imeandaa Mwongozo wa Upimaji **Toleo la Pili la tarehe 4 Januari 2021** kwa wasafiri wanaokwenda nje ya nchi na wageni wanaotembelea Tanzania wakiwemo Watalii.

1.1 Maeneo ya Mwongozo:

Mwongozo huu unaweka utaratibu wa maombi, upimaji, namna ya kupata majibu, uhakiki mipakani na gharama za upimaji kwa Wasafiri(watu wote wanaokwenda nje ya nchi kutokea Tanzania wakiwemo Madereva wanaosafirisha mizigo na abiria kwenda nje ya nchi, wageni wanaoondoka na Watalii).

1.2 Utaratibu wa Maombi na Upimaji:

1.2.1 Msafiri aelimishwe kupata taarifa kutoka katika Ofisi za Ubalizi wa nchi anayotaka kwenda juu ya uhitaji wa kupimwa ugonjwa wa COVID-19.

1.2.2 Msafiri atakayehitaji huduma ya upimaji ugonjwa wa COVID-19 afike katika Hospitali ya Mkoa au vituo maalumu vilivyoidhinishwa ikiwemo vituo vyote

vinavyofanya ufuatiliaji wa kila siku wa vimelea vya Influenza (Influenza Sentinel Sites) nchini kote akiwa na uthibitisho wa uhitaji wa kupima kwa nchi anayotaka kwenda ikiwemo hati ya kusafiria. Kwa Mkoa wa Dar es salaam Hospitali ya Taifa Muhimbili, Hospitali za Rufaa Mkoa Amana, Mwananyamala na Temeke zitahusika kuchukua Sampuli. Pia Hospitali ya Agakhan, Kliniki ya IST, Hospitali ya Sinza, Hospitali ya Mbagala na Hospitali ya Kigamboni pia zitahusika na zoezi la uchukuaji sampuli na kuziwasilisha Maabara ya Taifa kwa lengo la kupunguza msongamano wa wateja wanaosubiri huduma hiyo Maabara ya Taifa ili kwa kiasi kikubwa Maabara ibaki na zoezi la upimaji.

- 1.2.3 Ofisi ya Mganga Mkuu kila Mkoa isimamie zoezi hili la uchukuaji wa sampuli za na kuzituma katika Maabara Kuu ya Taifa iliyoko Mabibo, Dar es salaam.
- 1.2.4 Sampuli za wasafiri ziainishwe vizuri kwa kuandika maneno ya jina la Mkoa_ITR (International Traveller).
- 1.2.5 Msafiri aelimishwe kupima siku tano kabla ya siku ya kusafiri. Cheti cha COVID-19 kitadumu kwa muda wa siku 14 au itategemea masharti ya nchi husika anapokwenda.

1.3 Utaratibu wa kupata majibu na kupewa vyeti:

Majibu ya vipimo yatatumwa kwa Mganga Mkuu wa Mkoa husika. Kwa wasafiri ambao hawatakuwa na maambukizi watapewa vyeti na majina yao yatatumwa kwa njia ya kielektroniki kwa Wahusika na nakala kwa Mganga Mkuu wa Mkoa na Afisa Afya walioko mipakani kurahisisha uhakiki na kupunguza usumbufu kwa Wasafiri na Madereva. Majibu yatatolewa ndani ya saa 48 kwa Mikoa nje ya Dar es salaam na saa 24 ndani ya Mkoa wa Dar es salaam kabla ya safari.

1.4 Uchunguzi/ uhakiki wa vyeti mipakani:

Wasafiri ambao wanavyeti vya COVID-19 washauriwe kuwa vyeti vyao vitahakikiwa mipakani (verification). Utaratibu huu unaweza kufanyika kwa njia ya kielekitroniki.

1.5 Gharama za upimaji:

Gharama za vipimo vya COVID-19 zitakuwa ni **USD.100** kwa msafiri yeyote anayesafiri kwenda nje ya nchi ikiwemo **Watalii**.

N.B: Malipo haya yalipwe katika akaunti ya Serikali ya Huduma za Maabara ya Taifa na wahusika wapewe stakabadhi za kielekroniki za Serikali.

Mwongozo huu utaboreshwa kulingana na mahitaji.

Dkt. Dorothy O. Gwajima (Mb)
**WAZIRI WA AFYA, MAENDELEO YA JAMII,
JINSIA, WAZEE NA WATOTO**